

AVANT-PROPOS.

iniment dissipée, où qu'elle eut seulement mesme durée que ce Prince, apres la mort duquel l'Empire fut deschié & diuisé entre les Seigneurs & Capitaines de sa suite, c'est à sçauoir Ptolomee ; Laomedon, Antigone, Cassandre, Leonat, Emmene, Python, Lyfimaque Antipater, Meleagre, & Seleuque, entre lesquels les Principaux estoient Seleuque Roy de Syrie, Ptolomée d'Egypte, Antigone de la petite Asie ou Natolie, & Cassandre en fin Roy de Grece & de Macedoine.

Or ces esprits ambitieux ne pouuans viure en repos, il y eut de grosses guerres entr'eux, puis entre leurs fils & arriere fils, qui donnerent sujet aux Romains de les attaquer, & finalement de se rendre maistres peu à peu de tout ce partage.

Quant à l'Empire des Romains : pourco que i'en ay fait assez ample mention dans mes discours, ie le passeray icy sous silence, me suffisant de renuoyer le Lecteur à ce que i'ay dit ailleurs, afin qu'il voye comme toutes les terres des vnes & des autres ont esté depuis deuisees, & de quelle sorte on a tiré les Principautez qu'on void en ce temps de ces quatre grandes & principales pieces desmembrées.

Maintenant que ie me suis deliuré du petit scrupule qui me restoit, ie diray seulement à ceux qui s'occuperont à voir ces discours, que i'ay transplanté icy quelques pieces de certains Auteurs qui pouuoient seruir à mon dessein, tant pour éviter le reproche de quelque dessein, que pour esparagner aux Lecteurs la peine de chercher en plusieurs endroits ce qu'ils pourront trouuer en un seul. D'ailleurs cecy qui est comme une histoire, hormis en quelques lieux où il se faut ranger sur la consideration des choses plus importantes, ne requiert pas des pointes d'esprit, ou des recherches subtiles, mais le nu rapport de la verité qu'on peut auoir apprise par le moyen des esprits, en des recits de vne voix des personnes dignes de creance. Et les deux plus notables pieces que l'on y trouuera sont pour la premiere vn abregé d'Histoire des Roys de Perse, compilé par vn Portugais, qui voyageant par la Perse, & luy estant tombée es mains la Chronique de T A R I K M I R K O N D, Persan de nation vn des plus fameux Historiens, & de plus grande authorité & creance parmi ces Perses, prit la peine de la traduire & mettre en langue Portugaise. Cét ouure contient vne relation veritable de l'origine descendance, & succession des Roys de Perse, & de Hormuz iusques à l'entrée des Arrabes & Portugais en ces Royaumes : Avec vne liste de Kalifs de Bagadet, ou Babylone, qui ont seigneurie & commandé en la Perse depuis l'arrivée desdits Arrabes en ces contrées. Cét abregé d'Histoire contient des veritez au lieu des mensonges que l'antiquité nous a voulu faire croire de cette Monarchie Persane : & seruira d'vne grande lumiere & esclaircissement des affaires de ce Royaume qui se trouuent fort confusément escrites, avec de grandes contrarietez & discordances par Procope, Agathie, Genebrard, Zonaras, Tormamira, & autres Auteurs anciens.